

DISSERTATIO

MEDICO-CHIRURGICA.

DE

TUMORIBUS HUMORALIBUS


SIMPLICIBUS.

Cujus veritatem Deo duce & auspice Dei-parâ tueri cona-
bitur, in Augustissimo Monspeliensi Apollinis Fano, ab
horâ octavâ ad Meridiem, Die Mensis Aprilis
Anni 1731. HIERONIMUS SISSAUD,
Arausicanus, Artium Liberalium Magister, & jam
dudum Medicinæ Studiosus.

P R Æ S I D E;

Illustrissimo Viro D. D. ANTONIO
MAGNOL, Regis Consiliario & Medico,
nec-non in Almâ Monspeliensium Medico-
rum Academia Professore Regio dignissimo,
& in Senescalli & Præsidiali Curiâ Comite
Honorario.

Pro primâ Apollinari Laureâ consequendâ.



MONSPELI;
pud JOANNEM MARTEL, Comitiorum Occitania
& Universitatis, Typographum. 1731.



R. R. D. D.

PROFESSORES REGII.

Illustrissimus D. D. PETRUS CHIRAC,
Regi à Secretioribus Consiliis, Archia-
trorum Comes.

DISPUTATURI.

R. D. FRANCISCUS CHICOYNEAU,
Cancellarius & Judex.

R. D. JOANNES BEZAC, *Decanus.*

R. D. ANTONIUS DEIDIER, *Sancti
Michaëlis Eques.*

R. D. PETRUS RIDEUX.

R. D. HENRICUS HAGUENOT.

R. D. JACOBUS LAZERME.

R. D. FRANCISCUS CHICOYNEAU,
Filius, Patris Coadjutor.

R. D. GERARDUS FITZGERALD.

DOCTORES ORDINARI.

M. HUGO GOURRAIGNE.

M. PETRUS FOURNIER.

M. PETRUS GUISARD.

M. ANTONIUS FERREN.

M. ANDREAS CANTWEL.

M. FRANCISCUS IMBERT.

M. CLAUDIUS CHAPTAL.



ILLUSTRISSIMO AC NOBILISSIMO

V I R O D. D.

FRANCISCO CHICOYNEAU,

Regis Confiliario & Medico, nec-non in
Almâ Monspeliensium Medicorum Aca-
demiâ Professori Regio Anatomico, Bo-
tanico, Cancellario amplissimo, Judici
æquissimo, Horti Regii Monspeliensis
Præfecto, Regiæ Scientiarum Societatis
Socio, & in supremâ Computorum Sub-
sidiorumve Occitaniæ Curiâ Senatori in-
tegerrimo.

VIR ILLUSTRISIME,

*Perleves laborum meorum primitias tibi, veluti
Numini Medicinæ altero, tremulâ audeo dicare*

manu ; si enim eas Numinis instar benigno videris oculo , votis major superiorque , dulce mihi decus , secundum studiis jam factis omen , faciundis verò stimulum vividum haud temerè mihi auguror.

Is est enim , VIR ILLUSTRISIME , in orbe litterato nominis tui splendor , famaue ; ut opusculum hocce meum scuto tuo tectum , & consideratiùs habere , & de me feliciter sentire nullus prorsùs dubitaverit. Re quidem verà præstanter dicere , sapienterve judicare , nùm quisque tantùm paratum se putat , quantum ad te accedere valet ? Quàm sis præterea paterno , uxorioque sanguine clarus , quàm pulchrà , & quasi divinà prole clarissimus futurus , ex te verò quantò clarior , ut norunt sic demirantur omnes.

Verùm tot virtutum dives , quàm te facilem , quàm modestum , quàm parùm de te sentientem prabeas ! quis te unquàm vidit ? quis audivit ?

quis adivit ? Et admirationi non habuit ? Et non
amavit ? Et conspectu , sapientiâque tuâ fruentibus
ultrò non invidit ? sanè quidèm cum de cæteris , tum
præsertim de re medicâ dicens , nūmq̃uid ambiguos
tenes animos , utrū in te medicus oratori , an ora-
tor medico præcellat ? Eloquentia rarò se sic indul-
get , ut tota contingat , satis felix est qui in ali-
quam ejus partem receptus est , nudam se tibi tra-
didit , ita ut natura , & facundia ex æquo alumnus
aures penetres , oculos demulceas , animos invadas ,
triplicique hâc aureâ catenâ audientes tibi pro ar-
bitrio allicere valeas.

Nota dico , notiora dicerem , nempe tuam eximiam
ergà pauperes charitatem , cujus præprimis æterno
monumento erit sævissimâ nuperrimè peste flagrans
antiqua & nobilis Massiliensis Civitas ; sed vetat stil-
inopia , magis ac magis vetat , ipsa , quâ novo ful-
gore nites , nativa modestia.

*Accipe igitur, VIR ILLUSTRISIME, istud vene-
rationis in te mea levidense pignus, hoc ipso te iterum
Deo similem declaraturus, si non ex dignitate tua
estimaveris, sed ex animo ingenuo, ac devoto, quo
omni ævo tibi futurus sum.*

VIR ILLUSTRISIME,

**Addictissimus & obsequen-
tissimus cliens.**

H. SISSAUD.

**Dabam Monspelii
die 3^a. Mensis Aprilis
Anni 1731.**



DISSERTATIO MEDICO-CHIRURGICA

DE TUMORIBUS SIMPLICIBUS.

TUMOR simplex dicitur, cum præter illa ; quæ ei essentialia sunt, pars tumens, nullis aliis afficitur symptomatibus : Si quædam alia in eâdem parte affectâ simul infestent, ut rubor, cum colore albo, mollities, cum duritie, &c. Tumores Compositi vocantur, de quibus hic non agitur.

Quatuor sunt Tumores simplices *Phlegmone*, *Erysipelas*, *Oedema*, & *Scirrhus* : Ut autem horumce Tumorum theoria clariùs pateat, de Tumoribus calidis primùm & in genere differemus ; quare in hac Dissertatione agemus. 1°. De Tumoribus Calidis in genere, sive de *Phlogosi* & *Inflammatione*. 2°. De *Phlegmone*. 3°. De *Erysipelate*. 4°. De Tumoribus Frigidis in genere. 5°. De *Oedemate*. 6°. De *Scirrho*.

CAPUT I.

*De Tumoribus calidis in genere seu de
Phlogosi & Inflammatione.*

INFLAMMATIO est præter naturalis alicujus partis ; vel totius corporis calor, rubor, & dolor ; seu pars aut

2

totum corpus inflammata dicuntur, cum dolent, & præter naturam rubent, ac calent.

Inflammationis plures sunt differentia. 1^o. Inflammata pars plus vel minus tumet, aut quàm in statu naturali non magis prominet: si pars affecta præter naturam promineat, hæc inflammatio *Systrophica* dicitur, quia tunc, uti vox græca sonat, pars veluti convoluta & nodum efficere videtur. Si partis affectæ magnitudo aucta non appareat, & in illâ nisi rubor dilutus, minor calor, & dolor ferè insensibilis, aut nullus percipiatur, *Phlogosis* vocatur; & uti loquuntur veteres inflammatio sicca. Verùm quia *Phlogosis* inflammatione ut plurimum terminatur, & omnis inflammatio à *Phlogosi* incipiat; ideo *Phlogosis* nihil aliud est, quàm incipiens inflammatio.

2^o. Inflammatio universalis est vel particularis. Universalis dicitur, non præcisè quia omnes & singulæ corporis partes inflammatione simul tentantur; sed quia plures ex partibus superioribus vel inferioribus indiscriminatim, & eodem tempore inflammantur, uti contigit homini 30. circiter annos nato, qui ab aliquot diebus rheumatismo calido laborabat. Si una, aut altera tantùm corporis pars inflammatione correpta sit, inflammatio particularis dicitur: utraque sicca est vel erratica, essentialis vel symptomatica. Tandem particularis aliquandò, universalis verò ferè nunquàm critica est.

3^o. Inflammatio interna est, vel externa (nulla enim est pars quæ inflammatione tentari non possit) inflammatio si-
ve interna aut externa sit, pro parte quam afficit, varia nomina sortitur. In hac autem dissertatione de Tumoribus externis, & quæ in partibus mollibus sedem habent, tantùm agere animus est.

4^o. Inflammatio est simplex, si alio Tumore non stipetur; vel composita, si alii Tumori naturâ diverso adjuncta sit; tandem est complicata, si cum altero morbo infestet.

Jam ut tota *Phlogosis* & inflammationis theoria clariùs pateat, inquiremus 1^o. quænam est earum causa proxima,

2^o. A quibus causis tum antecedentibus, tum procartharticiis dependeant. 3^o. Ex stabilitâ causâ proximâ, illarum symptomata breviter enucleabimus.

Quoad primum. Causa proxima omnis inflammationis est hærentia sanguinis in arteriis lymphaticis.

Primò. Inflammationis causa proxima est hærentia sanguinis, seu partis rubræ cum parte albâ, ut inflammatio ab *Oedemate & Scirrho* distinguatur, ubi pars alba tantum stagnat.

Secundò. In arteriis lymphaticis; Nam etiam si arteriarum sanguinearum extrema, imprimis in magnâ inflammatione, plusquam in statu naturali, tumeant, attamen illarum arteriarum ultimi processus, seu arteriæ lymphaticæ sanguine primum ingurgitandæ sunt.

Nam 1^o. cum arteriæ lymphaticæ sanguinearum appendices sint, ipsisque continuæ, & textu, sanguineis, multò debiliores, appellentibus humoribus faciliùs cedunt, & à corporibus ambientibus, faciliùs comprimuntur, & angustantur; unde humores, summâ quantitate, vel motu valido propulso, in illis, priusquam in arteriis sanguineis, hære, & stagnare necessum est.

2^o. In omni inflammatione pars alba fit rubra, & quæ ex naturâ suâ rubra erat, non solum impensius rubescit; sed etiam, si quæ sint in statu naturali puncta alba interjecta, primum rubra videntur; quæque fieri non possunt, nisi vasa alba, seu arteriæ lymphaticæ rubrâ sanguinis parte infarciuntur.

3^o. Si inflammatio partium membranacearum, ab hærentiâ sanguinis in illarum arteriis lymphaticis, tanquam à causâ proximâ, ex omnium consensu, dependeat (nam partes illæ ex arteriis lymphaticis, quoad maiorem partem texuntur) quidni & inflammatio, quâ aliæ corporis partes affici possunt, ex eâdem causâ non dependeret? hæc ulteriori probatione non indigent.

Quoad secundum. Sanguis hæret in arteriis lymphaticis.

quia illa vasa angustantur, seu quia obstruuntur, vel comprimuntur, vel astringuntur.

Primò. Obstruuntur, si sanguis quantitate auctâ peccet, vel nimio motu ad ultima arteriarum capillamenta appellat, hinc in arterias lymphaticas vivide impingens, eas magis diducit; auctâ earum diametro, una cum parte albâ, globuli sanguinei ea vasa subeunt, & ampliato itinere; sanguis continuo affluens vasa illa magis, atque magis ingreditur, ea dilatat, adeoque distendit, ut sese restituere, aut saltem sufficienter contrahi nequeant; unde deficiente, aut summè imminutâ, earundem arteriarum lymphaticarum contractione (nam ab earum motu *Systaltico* humorum motum partim dependere, docet *Physiologia*) sanguis in illis hæret, & stagnat.

Quæcumque ergò humorum quantitatem augere, ut nimia alimentorum *euchimorum* quantitas, evacuationes solitæ suppressæ, maximè si sanguineæ sint, ut Catamenia & Hæmorrhoides, sunt causæ remotæ inflammationum: ita & ea omnia, quæ sanguinis motum intendunt, ut acria & irritantia alimenta, vel liquida spirituosiora, aer calidus, & æstuans, motus, exercitia immodica, vehementiora animi pathemata, ut ira; tandem inflammationem persæpè accersunt omnia irritantia exterius admota.

Vasa etiâ obturant sanguis crassus & spissus, modò valido & sufficienti motu propellatur; unde patet, quare in febrium ardentium decursu, partes externæ, & internæ inflammatione aliquoties corripiantur.

Secundò Arteriæ lymphaticæ comprimuntur corporibus ambientibus, ut ossibus fractis, aut à sede dimotis, liquoribus intra textum partium effusis, & aliis corporibus infixis, aut exterius gravantibus, injectis vinculis; ut quisquis experiri poterit si digitum sibi arctè devinciât.

Tertiò. Vasa astringunt omnia irritantia interioris assumpta, vel exterius admota; quare autem ex compressis, vel astrictis vasis, humores appellentes in illis hæreant & stagent, ex dictis facile intelligitur.

Quoad tertium. Tria sunt omnis inflammationis symptomata essentialia, scilicet rubor, calor, & dolor.

Primò. Rubor. Partium color, ab illo, quo tinguntur humores, quibus illarum vasa replentur, ex omnium *Physiologorum* consensu, dependet: cum ergò arteriæ lymphaticæ, quæ sanguinis parti albæ tantum devehendæ à naturâ destinatæ fuerunt, rubrâ etiâ replentur; partes, quæ ex illis texuntur, rubore plus vel minùs perfundi, prout illa vasa sanguinis majori, vel minori quantitate infarciuntur, consequens est.

Secundò. Calor. Infarctis arteriis lymphaticis, sanguinis motus in parte affectâ citò læditur; præpedito enim per obstructa vasa humorum circuitu, sanguis continuò appellens in vasa vicina irruit, ea, ut potè summè dilatata, validè contrahuntur: humores vasorum contractione pressi, resiliunt. Tandem ex mutuâ illâ solidorum & fluidorum actione, eorumque repetitis ictibus, pars affecta præter naturam calet.

Tertiò. Dolor. Cum per partem affectam sanguis liberè non fluat, & illius vasa appellente sanguine validè, & inordinatè distendantur, fibrillæ nerveæ, ex quibus illa vasa texuntur, usque ad animæ sedem distrahendæ sunt; unde dolor, qui varius est, prout fibræ nerveæ crassiores, aut tenuiores, & plus vel minùs tensæ percutiuntur.

Præter hæc, pro naturâ inflammationis, illius sede, symptomatum vehementiâ, alia symptomata superveniunt; ut febris, dolor capitis, vigiliæ, delirium, motus convulsivi, convulsio, &c.

PRIMò. Febris multò minùs à vividâ partis affectæ fibrillarum nervearum distractione, quâ totum genus nervosum aliquoties concutitur, quàm ex accelerato sanguinis motu versùs cor, ob præpeditum illius cursum per vasa angustata, dependet. Et certè, si validâ nervorum commotione febris induci possit, cur vehementibus doloribus Colicis, aut Nephriticis, nisi partes illæ inflammentur, non supervenit? anne quia totum genus nervosum tunc non sufficienter commovetur; aut Spiritus Animales debitâ quantitate, &

motu non refluent, & influunt? in illis tamen gravissimis affectibus, totum corpus motibus Convulsivis quàm sæpè torquetur; anne quia ex inflammatione nervi alio modo concutiuntur, aut Spiritus à parte affectâ refluentes, ad cor debitâ quantitate, motuque convenienti tunc influunt? Hæc supponant, per me non stabit, sed quo fundamento, certè ignoramus.

Quare ergò febris inflammationi ut plurimum supervenit? Febrem à præpedito aut minus libero sanguinis circuitu in extremis arteriis sanguineis, tanquàm, à causâ proximâ dependet: in inflammatione autem, arteriæ lymphaticæ sanguine infarciuntur; unde illius cursus in vasis vicinis, seu arteriis sanguineis adhuc liberè perficiendus, vel summe retardandus est. Si primùm, nulla est febris. Si secundum, quod contingit, vel quia arteriis lymphaticis sanguine turgidis, arteriæ sanguinæ vicinæ etiàm infarciuntur, vel ab infarctis vasis comprimuntur, aut propter utrumque, sanguis per vias liberiores, seu per vasa quæ à corde minùs distant, ad cor redire tenetur; unde illius cursus acceleratur, cor & arteriæ frequenter dilatantur & contrahuntur, seu febris propter præpeditum sanguinis, per partem inflammatione correptam, circuitum, accenditur; cui inducendæ aut saltem fovendæ, systematis nervosi, propter dolorem vehemens commotio etiàm concurrit: hinc enim vasa sanguinea, cor ipsum validius contrahuntur, & sanguis qui ad cor velociùs appellit, majori vi ab ipso corde propellitur.

Quamquam hæc ulteriori probatione non indigerent; at tamen, quia hoc nostrum de febribus systema theoreticum, totis viribus aliqui evertere nituntur, rem paulo fufius exponere juvat.

10. *Velocitas sanguinis eâ ratione diminuitur, quâ ramorum numerus augetur.... Velocitas sanguinis in arteriis evanescentibus, utrobique divisionum arteriarum numero, est proportionalis: In iis itaque parvis arteriis, quæ ab Aortâ primùm oriuntur, & post paucas divisiones, in venas, fluida sua transmittunt, sanguinis velocitas non multum retarda-*

datur. Clariss. Keill, Tentam. Med. Physic. Tentam. 2.

20. Quantitas fluidi, quæ per tubum effluit, proportionalis est, celeritati quâ per illum tubum movetur & fluit.

30. Cum arteriæ & venæ illis continuæ, sint totidem Syphones, & sanguis per primas arterias, velocius quàm per subsequentes, moveatur, datâ eâdem vasorum diametro, sanguis per primos Syphones, seu per vasa quæ à corde minus distant, intra idem tempus majori velocitate, quàm per remotiora ad cor refluet.

Præterea supponamus sanguinem, ex corde in omnes aortæ ramos, eâdem vi propelli; verùm, quia effectus virium in breviorẽ Syphonem, seu in vasa à corde minus distantia, est ad effectus virium in longiorẽ, seu in vasa remotiora, ut altitudo longioris Syphonis, est ad altitudinẽ brevioris; nam illi duo Syphones qui ejusdem diametri supponuntur, sunt inter se, ut eorum altitudines, & virium effectus sunt reciprocè proportionales quantitatibus liquorum, ex hypothesi quod unus Sypho sit altero duplo altior, effluet per breviorẽ Syphonem, dupla quantitas liquoris quàm per longiorẽ: Sed si addas sanguinem per breviorẽ Syphonem, quàm per longiorẽ majori vi protrudi, ex breviori Syphone non solum duplo major sanguinis quantitas effluet, sed eò magis, quò sanguis per breviorẽ, quàm per longiorẽ majori vi propelleretur, seu sanguis eò celerius & majori quantitate per venas ad cor refluit, quò arteriæ & venæ quibus devehitur, minus à corde distant.

His ita præmissis supponamus ex illis Syphonibus, longiores, seu arterias sanguineas à corde remotiores in inflammatione obturari; aut saltem sanguinem in illis liberè non fluere, illas enim, iis, quæ à corde minus distant, priùs angustari, omnes consentiunt: Dico sanguinem per vasa liberiora majori velocitate, intra idem tempus fluere ad cor, quàm ferebatur per Syphones omnes, seu per omnia vasa dum libera erant; ac proinde, cor tunc frequentius dilatur & contrahitur; seu febris inflammationi adjungitur.

1º. Sanguis velocius movetur per primos arteriæ ramos,

quàm per subsequentes; quia vires cordis ibi validiores sunt, & velocitas sanguinis eâ ratione minuitur, quâ ramorum numerus augetur; Ergò si vires illæ quæ recedentes à corde continuo imminuuntur, nondùm deperditæ, primis vasis, seu liberis applicentur, debent in sanguinem, in illis primis vasis contentum majori vi agere, quàm agebant in sanguinem, qui in ramis remotioribus continetur.

2°. Vires illæ aliundè majores in sanguinem in vasis brevioribus contentum agunt; Ergò sanguis ille, intra idem tempus multò majori celeritate ad cor propellendus est, seu sanguis; remotioribus vasis sanguineis angustatis, aut per ea liberè non fluens, per vasa libera majori celeritate ad cor appellet, quàm per omnia vasa libera ferebatur. 1°. Quia vires, quas sanguis à corde, & majoribus arteriis accipit, sanguini per vasa libera propellendo omnes impenduntur. 2°. Quia vires illæ tunc eò multò majores sunt, ut nondùm deperditæ, vasis à corde minùs remotis applicentur; velocitas enim sanguinis à corde egredientis, eâ ratione imminuitur, quâ ramorum numerus augetur. 3°. Tandem, quia illæ vires brevioribus vasis admotæ, minores inveniunt resistentias; nam uti demonstratum est superiùs, admotis iisdem viribus, dupla fluidi quantitas per Syphonem breviorē, quàm per longiorem effluit.

Nec dicant ex accelerato sanguinis motu per vasa libera, sanguinem, qui in venâ cavâ continetur, majori vi & velociùs ad Cor non propelli; Nam cum sanguis è venâ cavâ in dextram cordis auriculam non ingrediatur; nisi, quia adveniente in venam cavam, sanguine propellitur. Adauctâ sanguinis affluentis velocitate in venâ cavâ reclusus, illi cedere tenetur; sanguis enim venæ cavæ, cum sanguine, in quocumque corporis vase contento, continuus est; qui proinde per vasa minora velociùs fluere non potest; nisi, qui in majoribus vasis, & in venâ cavâ continetur, eodem tempore versus cor progrediatur: Unde cum obstructis vasis remotioribus, sanguis per vasa minùs remota velociùs moveatur, qui in venâ cavâ continetur, majori velocitate in cor influere, necessum est.

Secundò.

SECUNDÒ. Tùm propter vehementes, quibus ægrotantes percelluntur, dolores, tùm propter accensam febrem Meninges & fibræ Medullares Cerebri adeò tenduntur; ut facillimè distrahantur, succutiantur, & commoveantur; unde dolor capitis, si Meninges distrahantur; Vigiliæ, si fibræ Medullares nimium tensæ facilè commoveantur. Tandem ægrotantes delirant, si eadem fibræ præter modum tensæ adeò commoveantur, ut exinde Anima, aliis ideis neglectis, de illis, & pro illis quibus vividè percellitur, tantum judicet; unde disjungenda conjungit, jungenda separat, seu fit delirium. Tandem fiunt motus Convulsivi, si lymphæ nervea valido motu, sed interpolato: Convulsio verò, si eodem motu, sed continuo ad musculos influat.

Hæc sunt præcipua symptomata tùm essentialia, tùm accidentalialia, quæ inflammationibus partium externarum frequentius superveniunt. Inflammationes internæ aliis stipantur; sed hæc non sunt hujus loci.

Inflammatiō in *Phlegmone* aut *Erysipelas* ut plurimum abit; *Phlegmone* enim & *Erysipelas* sunt veluti inflammationis species. Quare sit.

CAPUT II.

De Phlegmone.

PHLEGMONE est illa inflammationis species in quâ pars affecta plus vel minùs circumscriptè tumet, cum rubore impenso, calore magno, tensione, & dolore pulsatili.

Si *Phlegmone* circumscriptè promineat, *Phlegmones* nomen retinet; si vero minùs circumscripta sit, Tumor *Phlegmonodes* dicitur.

Phlegmone est essentialis, vel symptomatica, vel critica.
CAUSÆ. Causa proxima *Phlegmones* est hærentia sanguinis

in arteriis lymphaticis, & in ultimis arteriis sanguineis.

Phlegmone ab iisdem causis internis & externis, sed majori vi agentibus, quàm in inflammatione & *Erysipelate*, dependet; quare illis recensendis supersedemus. Ex adauctâ magis sanguinis quantitate, aut si velociori motu agatur, vel si vasa magis comprimantur, aut astringantur, sanguinem non solum in arteriis lymphaticis, sed & in ultimis arteriarum sanguinearum capillamentis, hæere & stagnare, nemo non videt.

SYMPTOMATA. Ex assignatâ causâ proximâ, tum essentialium, tum accidentalium *Phlegmones* symptomatum theoria facile deducitur.

1^o. In *Phlegmone* non arteriæ tantum lymphaticæ, sed etiam ultimæ arteriæ sanguinæ plus vel minus, sed semper multò magis, quàm in inflammatione & *Erysipelate*, sanguine infarciuntur; unde *Phlegmonem* plus vel minus prominere, necessum est.

2^o. *Phlegmone* est Tumor plus vel minus circumscriptus. Ideò *Erysipelas* parum aut nullatenus prominet; quia, uti dicemus Cap. seq. obstructis tantum extremis arteriarum lymphaticarum finibus, sanguis appellens in vasa vicina sat facile irruit, & in illis moram non trahens maximam, ea præter modum non replet; unde pars affecta in *Erysipelate* parum, aut nullatenus prominet, & ipsum *Erysipelas* latè expanditur: contrarium vero in *Phlegmone*, ubi sanguis non in extremis tantum arteriis lymphaticis, sed etiam secundum earum tractum, imò & in ultimis arteriis sanguineis hæret & stagnat; quare sanguis appellens vasa vicina minus liberè, quàm in *Erysipelate* adit, ac proinde vasa primum infarcta multò magis replentur: seu *Phlegmone* plus vel minus circumscriptè prominet; quia in vasis partis affectæ, majori, quàm in partibus ambientibus, quantitate sanguis colligitur.

3^o. *Phlegmone* impensè rubet; in illâ enim non solum arteriæ lymphaticæ, sed etiam arteriarum sanguinearum ultimæ divisiones sanguine maximè infarciuntur.

4°. Ex præpedito in *Phlegmone* sanguinis libero cursu ; qui appellit sanguis vasa validè dilatat , quibus successivè contractis , partis calor intenditur , ac summè adaugetur.

5°. Cur *Phlegmone* sit summè tensa , tactui difficilè cedat , ex illius vasorum summo infarctu deducitur.

6°. Adest dolor pulsatilis : Quare in inflammata parte dolor perentiat , diximus Cap. præced. In *Phlegmone* autem , ille dolor pulsatilis est , quia ibi fibræ nervæ validis & successivis arteriarum ictibus , seu pulsationibus distrahuntur ; unde cum illo dolore est iudicium rei pulsantis , seu dolor pulsatilis adest.

Præter hæc alia , sed accidentalia uti in omni inflammatione , symptomata superveniunt , ut febris , delirium &c. de quibus egimus Cap. præced. Ita etiã ex dictis patet quomodo mechanismo *Phlegmone* essentialis , vel symptomatica , vel critica induci possit.

DIAGNOSIS. Quinque sunt omnis *Phlegmones* symptomata essentialia , Tumoris circumscriptio , rubor impenitus , calor magnus , tensio , & dolor pulsatilis : His signis *Phlegmone* dignoscitur & à quocumque alio Tumore distinguì potest.

Dignosces 1°. utrum *Phlegmone* sit essentialis , si ab alio morbo non dependeat. 2°. Si sit symptomatica , ab alio affectu inducitur , cujus vehementiam intendit. 3°. Tandem erit critica , si cum bonis ægri rebus promineat.

A quâ causâ dependet , ex præpressis , vel ægrotantis , aut adstantium relatu , facilè dignoscitur.

PROGNOSIS. *Phlegmone* critica nullum periculum portendit , imprimis si perfectè critica sit ; symptomatica , sicuti essentialis eò magis vel minùs periculosa est. 1°. Pro numero & vehementiâ symptomatum , & pro naturâ morbi à quo dependet ; undè in peste & febribus malignis lethalis , aut semper omni periculo plena est. 2°. Pro parte quam afficit ; hinc , quæ in partibus carneis , citiùs & feliciùs terminatur , quàm si ligamentis , vel tendinibus , vel articulis , vel nervis , aut vasis majoribus insideat : quò partes affectæ

sensu exquisitiori donantur, eò *Phlegmone* ibi periculosior est; hæ partes facilius divelluntur, undè dolores sæviores, gravissima alia symptomata, & gangræna ipsa superveniunt, aut suppuratio numquàm laudabilis est: ipsa etiàm *Phlegmone* critica in illis partibus periculo non vacat; hinc patet, quare *Phlegmone* internâ, externâ multò periculosior sit.

Parva *Phlegmone* minùs periculosa est, quàm si magna sit; nam præter quàm quòd resolutione facilius terminatur, partes vicinas etiàm minùs lædit; maximè si in parte carneâ sedem habeat.

Meliùs est si *Phlegmone* resolutione, quàm suppuratione terminetur, pejus si in *Scirrhum*, pessimum si in gangrænam, aut sphacelum abeat.

CURATIO. Ad *Phlegmonem*, sicuti alium quemcumque Tumorem in particulari, debellandam, hæc tria agenda habet Medico-Chirurgus. 1º. Præpediat, ne quæ incipit *Phlegmone*, adaugeatur. 2º. Facta tollatur. 3º. Varia symptomata debellantur & mitigentur.

Quoad primum. Præpediet ne quæ incipit *Phlegmone* ulterius excrescat; si, remotis omnibus causis internis & externis, humorum quantitatem imminuat, nimiumque eorum motum compescat, eos in partes oppositas divertat, illorumque qualitates corrigat.

Primò. Humorū quantitas imminuatur. 1º. Diætâ tenui; quare si vires permittant (raro non permittunt) ægrotañtes iusculis ex juniori pullo gallinaceo, vel carne vitulinâ nutriantur. 2º. Venæ sectione, quæ, si vires non sint exolutæ, aut si febris intensa sit, aut ægrotans plethoricus, quartâ quâlibet horâ instituatur, & sanguis primis vicibus largâ manu emittatur. Uti celeberrimi Medici Monspelienses in Peripneumoniâ, aut quâcumque inflammatione internâ debellandâ feliciter experiuntur.

Secundò. Ad compescendum humorum motum, præter reperitas venæ sectiones, diætâ etiàm tenuis sit, & refrigerans; undè per omnia *Phlegmones* tempora, tanquàm sum-

mè noxia longè arceantur, Aër calidus & æstiuans, alimenta calida, falsa, piperata, liquores ardentes, ipse vini usus, exercitia, & vehementia animi pathemata. Verùm selecto, in quantum fieri poterit, aëre nec calidiori, nec frigidiori, æger pro potu utatur ptisanâ ex radicibus acetosæ, graminis, lactucæ, vel decocto hordei: & si magis refrigerare opus fuerit, ptisanæ addatur spiritus sulphuris, aut vitrioli ad gratam aciditatem, aut nitrum purificatum, vel ptisana paretur ex aquâ fontanâ, in quâ limones per talcolas secti infuderint.

Quolibet die, injiciantur Enemata ex decocto emollienti & refrigerante, cum melle violato, vel oleo florum liliorum; sed si magis evacuare animus sit, adde cassiam & cannâ recenter extractam, vel mel mercuriale, aut catholicum.

Horâ matutinâ præscribantur juleppi ex aquis acetosæ, cichorii, endiviæ, lactucæ, nymphææ, aut syrupo de limonibus, violato, capillorum veneris, de granatis acidis, de agresta, de nymphæâ.

Horâ serotinâ, emulsiones ex amygdalis dulcibus ex-corticatis, quatuor semin. frigid. major. cum syrupo violato, vel de capillis veneris.

Tertiò. Humores venæ sectionibus aliò deflectantur; unde si *Phlegmone* ab evacuatione quâdam suppressâ, ut Catameniiis, vel Hæmorrhoidibus, vel Hæmorrhagiâ criticis dependeat; illæ evacuationes remediis convenientibus, etiâ eodem tempore quo *Phlegmone* debellatur, restituendæ sunt.

Quartò. Prava humorum qualitas corrigatur. 10. Emeticis, si *Phlegmone* ab alimentorum præviâ ingurgitatione, aut pravâ eorum coctione dependeat, vel si nausea infestet, aut æger jam vomat, & sint alia vomitum indicantia. Emetica tutiora sunt vinum, aut tartarum emeticum. 20. Catharticis, si alimentorum ingurgitatio præcesserit, æger cibos fastidiat, abdomen tumidum pressioni facilè cedat, & absint vomitus signa: illa cathartica non validiora esse oportet, & eò minus quò febris fuerit intentior; quare potiones pa-

rentur ex cassiâ, tamarindis, rhabarbaro, mannâ, syrupo de cichorio vel rosato solutivo, de floribus persicorum; & si magis movere necessum fuerit fenna, electuarius de cirro, aut diacarthami adjungi poterunt.

Quoad Defensiva, & Repercutientia in ipso etiâ *Phlegmone* principio non conveniunt, nisi contusioni supervenerit: inter quæ laudantur radices bistortæ, pentaphili, tormentillæ, folia plantaginis, centinodiæ, rosæ rubræ, nuces cupressi, sanguis draconis, alumen, bolus armena, terra sigillata, colcothar, oleum rosatum, unguentum de lytargirio, emplastrum de spermate ranarum, ceratum frigidum galeni; quæque sola, vel plura ex illis albumine ovorum subacta, cataplasmatibus formâ parti affectæ admoventur.

Quoad secundum. Tum propter causarum vehementiam, tum, quia nulla remedia aut malè adhibita, aut parùm proficua fuerint; *Phlegmone* quàm sæpè adaugetur & ad statum pervenit: si hæc contingant, humores stagnantes, aut extravasati à quibus *Phlegmone* dependet, quàm citò resolvendi, aut factâ apertione educendi sunt.

Verùm *Plegmone* resolutione aut suppuratione non semper desinit, *Scirrho* aliquoties, vel *Gangranâ* aliquando terminatur; aut ità mali moris est, aut ratione suæ sedis tam gravia accersit symptomata, ut nec resolutio, nec suppuratio tutò, aut numquàm expectandæ sint: quare si *Scirrho* desinat, Tumor tractetur, uti dicemus Cap. 60. Si *Phlegmone* gangrana superveniat, pars affecta spiritu vini simplici, aut camphorato pluriès foveatur, eaque omnia admoveantur, quæ contra *Gangranam*, aut *Sphaselum* prodesse usus docuit; sed hæc non sunt hujus loci. Tandem si *Phlegmone* ità partibus vicinis officiat, ut gravia mala immineant aut jam supervenerint; humores stagnantes aut extravasati, factis debitis scarificationibus, citò foràs eliminandi sunt: uti fusè exposuimus ubi de Tumoribus humoralibus in genere: quare hîc tantum methodum proponam, quâ *Phlegmone* resolutione, aut suppuratione tractanda est.

Quamquam in omni *Phlegmone* pars tensa sit, quæque proinde ut resolutio aut suppuratio perfecta habeatur, remediis convenientibus laxanda est; attamen, quia in omni *Phlegmone*, aut toto illius decursu pars affecta non æqualiter tenditur; ideo, ut resolventia & suppurantia tuto admoveantur, attendat oportet Medico-Chirurgus partis affectæ tensioni, calori, & dolori.

PRIMÒ de Resolventibus. Si pars affecta cum calore & dolore maximè tensa sit, omnia resolventia laxantia sint & anodina; inter quæ laudantur radices altheæ, malvæ, liliorum, folia altheæ, branchæ ursinæ, solani, hyosciami, flores liliorum, chamæmeli, meliloti; semina lini, fœni græci, farinæ hordei, fabarum, oroborum, lupinorum, lac, butyrum recens, adeps cervina, porcina, oleum olivarum, liliorum, lini, unguentum de althea, populeum, & id genus plura alia, ex quibus cataplasmata aut fots parantur.

Tandem si pars *Phlegmone* tentata minùs tensa sit, cum laxantibus resolventia calida, de quibus agemus Cap. 50. feliciter permiscantur; nam simul & debitâ quantitate permixta, sibi mutuas manus præstant: quare vinum tepidum, sicuti cataplasma quod componitur ex vini rubri optimi Lib. III. micæ panis Lib. I. & semis, simul coctis ad cataplasmatæ consistentiam, mirè resolvit in augmento, & in statu; modò pars nec nimis tensa, nec ultramodùm caleat aut doleat, alioquin summè noceret.

SECUNDÒ de Suppurationibus. Iisdem remediis quibus Tumores resolvuntur, *Phlegmone* pus persæpè emittit; resolventia enim medicamina suppurationem, suppurantia resolutionem non rarò promovent. Quare ut *Phlegmone* ad laudabilè suppurationem perducatur, partis affectæ tensioni, calori, & dolori, attendere necesse est; quæ si maxima fuerint, suppurantia omnia laxantia sint, aut calida cum laxantibus suppurantia majori vel minori quantitate permisceantur, prout pars affecta magis vel minùs tensa est, calet, & dolet.

Ad faciliorem suppurationem promovendam laxantibus, de quibus egimus superius, suppurantia adjunguntur, cepæ,

folia acetosæ, limaces contusi, vitellum ovorum, fermentum vetus, unguentum basilicum, ex quibus, & aliis cataplasmata parantur.

Si *Phlegmone* minùs tensa sit, cum laxantibus adde aliqua ex solventibus calidis.

Dum resolutio, vel suppuratio promovetur, diæta sit tenuis & refrigerans, sanguis mittatur, alvus libera sit, cathartica etiã & emetica, si indicentur uti diximus superius, præscribantur.

Quoad tertium. Symptomata essentialia, tũm accidentalialia remediis internis & externis jam præscriptis, præcaveantur & mitigentur: quare in illis fusiùs exponendis diutiùs non immorabimur. Id unum de febre animadvertendum est; nam etiãsi tempore suppurationis intendatur, attamen nec ægrotans perterreatur, nec illi placandæ (modo non intensior sit, nec gravissima inducat symptomata) Médico-Chirurgus non incumbat.

Horã serotinã ad somnum conciliandum, & dolores placandos, syrupus de papavere albo à Drag. III. ad Drag. VI. in adultis, vel laudani opiatichi à gr. semi ad grana II. præscribantur. Tandem quoad motus convulsivos & convulsiones, deliria, & alios capitis affectus, vena in talo tundatur: sed hæc ad morbos internos pertinent.

Factã suppuratione abscessus aperiatur, ut appositis remediis convenientibus, ad perfectam cicatricem ulcus perducı possit.

C A P U T III.

De Erysipelate.

E R Y S I P E L A S à colore rosaceo, *rosa*, est Tumor Humoralis inflammatorius, cum colore rosaceo, & calore deurenti.

Erysipelas

Erysipelas aliud est essentialiale, aliud symptomaticum; utrumque est inflammationis species, & in *Phlegmonen* quandoque degenerat; quodque proinde ab hærentiâ sanguinis in arteriis lymphaticis dependet, sed quæ multò minor est in *Erysipelate*, quàm in *Phlegmone*: seu causa proxima *Erysipelatis*, est hærentia sanguinis in ultimis arteriarum lymphaticarum finibus.

CAUSÆ. Quoad causas internas & externas. *Erysipelas* sicuti aliæ inflammationis species, ab iisdem deperdet; eadem enim causæ, uti multiplici observatione constat, modò *Phlegmonen*, modò *Erysipelas* inferunt, prout magis vel minus angustatis arteriis lymphaticis, sanguis majori vel minori quantitate, in illis colligitur: quare earum *Ætiologia*, ex iis quæ diximus Cap. 1.^o reperti potest.

Ex iis colliges, quantum illi errant, qui omne *Erysipelas* à præpeditâ perspiratione tantum dependere, asserunt: & certè nonne externa viscerum facies, & eorum contextus *Erysipelate* aliquoties tentantur? Verùm præpedita perspiratio *Erysipelas* ut plurimum infert, quia hæc evacuationum maxima, aliis sæpius supprimitur: cutis aëri & aliis causis externis, quàm aliæ corporis partes, magis objicitur; unde intelligitur, quare facies & totum caput, aliis corporis partibus, frequentius *Erysipelate* tentantur.

SYMPTOMATA. 1^o. *Erysipelas* est Tumor humoralis, inflammatorius, & superficialis. Sanguine in ultimis tantum arteriarum lymphaticarum finibus congesto, qui continuo appellit, cursu suo parum præpedito, vasa collateralia, utpote quæ libera, subit, & pars affecta, quàm in statu naturali non magis, aut parum tumet: hinc etiàm intelliges, quare *Erysipelas* inter Tumores, à nonnullis non recenseatur.

2^o. Cum sanguis in *Erysipelate* parvâ quantitate congeratur; hinc illius color ad summum rosaceus est.

3^o. Qui ad partem affectam adit sanguis, vasa collateralia sat facile ingreditur; unde illius vasis sanguine pa-

rùm distentis , *Erysipelas* vel leviter pressum , tactui facile cedit , & colorem mutat , seu ex rubro fit album ; sed quem citò recuperat , tùm quia pressus sanguis partim retrograditur , tùm etiàm quia angustati arteriarum lymphaticarum fines , continuo affluenti sanguini obices ponunt ; unde in illis vasis iterùm colligitur , & pars primum ruborem recipit.

4°. A parte in partem *Erysipelas* facile serpit : vasa sanguine parùm infarcta , tùm vi suâ *Systalticâ* , tùm vasorum vicinorum repetitis ictibus , ab stagnantibus humoribus expediti possunt , quique humores si resolvantur *Erysipelas* totum curatur ; vel intra majora vasa propulsi , in aliis corporis partibus decumbunt , in illis hærent , aut difficilè moventur , & partes illæ *Erysipelate* afficiuntur.

5°. Cum in parte *Erysipelate* tentatâ , sanguis vasa vicina facile subeat ; quare *Erysipelas* plus vel minùs extendatur , & circumscriptè non tumeat , facile intelligitur.

6°. In *Erysipelate* calor perſentitur ; quia vasa magis dilatata , validiùs quàm par est , oscillant : ille calor deurens est , seu cum sensu qui inducitur à corpore deurenti , nimirùm cum sensu doloris acutissimi , quia , angustatis tantùm ultimis arteriarum finibus , appellente sanguine minimæ fibrillæ nerveæ distrahuntur ; unde dolor plus vel minùs acutus.

7°. Si *Erysipelas* in externo corporis habitu sedem habeat , calore deurente , corpus mucosum rarefit ; humores diruptis suis vasis , expanduntur ; tandem , solutis cutim inter & cuticulam vinculis , vesiculæ humore aqueo-lymphatico , modò pellucido , modò subflavo repletæ elevantur , quæ exsiccatae in squammas decidunt.

Cur febris , & alia symptomata *Erysipelati* aliquandò superveniant , & quo mechanismo *Erysipelas* symptomaticum inducitur , ex iis quæ huc usque diximus , facile deduci potest.

DIAGNOSIS. Ex traditâ definitione , *Erysipelas* facile dignosci potest , & à quocumque alio corporis Tu-

more, levi negotio etiàm distingui : Nàm in *Phlegmone* pars affecta tumet, dura est & renitens, impensè rubet, & dolor pulsabilis est; *Erysipelas* autem Tumor est superficialius, colore rosaceus, mollis aut tactui parùm resistens, extensus, serpens à parte in partem, cum calore deurenti.

Utrùm sit essentialiale, vel symptomaticum, & à quâ causâ dependeat, ex ægrotantis, aut adstantium relatu, facilè detegi potest.

PROGNOSIS. Varia est *Erysipelatis* prognosis. 1^o. Si externas partes occupet, multò minùs periculosum est, quàm cum internas afficit; unde, si ab externis ad internas partes mutatur, malum est. *Erysipelas foràs intrò converti, malum: intùs verò foràs, bonum.* Hipp. Aphor. 25. Sect. 6.

Externum *Erysipelas* eò magis periculi portendit, quò magis universale est. Ita etiàm malum est, si ossi denudato superveniat. *Ab ossis denudatione Erysipelas, malum.* Aphor. 19. Sect. 7.

Malum etiàm est, si *Erysipelas* pus emittat. *Erysipelati si supervenerit putredo, aut suppuratio, malum.* Aphor. 20. Sect. 7.

CURATIO. Veteres Medici à bile tenuissimâ, aut sanguine volatili *Erysipelas* dependere credebant; juxta omnes ferè recentiores, perspiratio præpedita est illius causa proxima: hinc in tractando *Erysipelate*, rejectâ, aut parùm usitatâ sanguinis missione, cathartica & sudorifica tantùm, & ut totidem specifica habita sunt. Verùm *Erysipelas* nec à bile, nec à sanguine tenui dependet: & quanquàm ob præpeditam perspirationem persæpè inducatur, eâque evacuatione restitutâ, non rarò curetur; indè tamen venæ sectio, & alia remedia non sunt abdicanda, neque cathartica atque sudorifica semper & indiscriminatum præscribenda. Quare 1^o. præcavendum est, ne *Erysipelas* adaugeatur. 2^o. Factum tolli oportet. 3^o. Symptomata debellanda, aut mitiganda sunt.

Primò. Præcavetur, ne incipiens *Erysipelas* adaugeatur, si remotis omnibus causis, in quantum fieri poterit, humorum quantitas imminuatur, eorum qualitas corrigatur, tandem humores à parte affectâ avertantur; uti diximus Cap. præced. de Curatione *Phlegmones*.

Quæres utrum venæ sectio æquè hic conveniat, ac in *Phlegmone*.

Respondeo. Ratione *Erysipelatis* venæ sectio, saltém reiterata, non convenit; quia ibi minima est sanguinis in vasis collectio; at ratione causæ à quâ dependet, & vehementiâ symptomatum, quæ illud per læpè concomitantur, aut illi superveniunt, observatione & ratione suffuturûs dico, venæ sectionem æquè necessariam esse, ac in *Phlegmone*. 1^o. Ratione causæ, si *Erysipelas* ab humorum copiâ, aut illorum rarefactione dependeat, sanguis mittendus, & venæ sectio eò sæpiùs iteranda est, quò sanguinis quantitas magis exuberat, aut illius rarefactio major erit: præterea *Erysipelas* ab illis causis dependens in *Phlegmonem* persæpè degenerat, cui præcavendo nil plus confert, quàm repetita sanguinis missio. 2^o. Ratione symptomatum, si febris urgeat, adsint deliria, motus convulsivi, aut si ægri doloribus sævissimis torqueantur, sanguis etiàm pluriès mittatur, & pro parte affectâ alio deducatur: quantum autem in *Erysipelate* faciei emolumentum præ se ferat venæ sectio in talo, neminem in praxi vel leviter versatum; latet.

Quoad Cathartica, Emetica, & Sudorifica non solum contra *Erysipelas*, sed ad alium quemcumque morbum debellandum (modò indicata sint, & nihil contra indicet) præscribenda sunt, eaque iteranda, prout indicatum fuerit: imò etiamsi primo intuitu indicata non videantur; attamen feliciter quàm sæpè exhibentur; nam præter quàm quòd humorum quantitatem imminuunt, illos etiàm revellunt; inde. 1^o. Cathartica ita proficua sunt in *Erysipelate* faciei. 2^o. Cum *Erysipelas* à præpeditâ perspiratione persæpè dependeat, irritatis catharticorum ope Intestinis,

perspiratio interna adaugetur : partes enim internæ , sicut externæ indefinenter perspirant (uti ex apertione animalium vivorum manifestum est) unde humorum aqueo-lymphaticorum quantitate imminutâ , & à cute in interiora deductâ , pars *Erysipelate* tentata à sanguine stagnante faciliùs sese expedit. Verumtamen si febris intensissima foret , & sævissimis doloribus ægri torquerentur , totumque corpus summè æstuarer : præterea quòd tunc rarò indicantur , cathartica non sunt præscribenda ; aut si ea præscribere necessum sit , pro indicationibus urgentioribus ; morbi , & illius symptomatum intensione usurpentur ; seu sint plus vel minùs levia , prout febris , & alia symptomata leviora fuerint. Ita & emetica , si indicentur cautè exhibeantur : de Sudorificis agemus in sequentibus.

Jam apud omnes in confesso est , in *Erysipelate* (maxime si in facie sedem habeat) omnia repercutientia noxia esse , nisi *Erysipelas* à contusione , & proprio partis affectæ vitio dependeat , uti diximus de *Phlegmone* ; & tunc etiàm prudenter admoveantur , suo pondere partem gravant , vasa perspiratoria aut nimium laxant , aut astringunt , aut obstruunt.

Secundò. Si *Erysipelati* putredo , aut suppuratio superveniat malum , inquit Hyppocrates ; suppurantibus adaucto partis affectæ calore , partium textus solvitur , humores in ultimis arteriarum finibus stagnantes vasorum ictus eludunt ; unde non laudabilis suppuratio , sed *Sphacelus* , aut partis livor , indolentia , *Phlictenæ* se produnt putredinis prænuntiæ : quare vitentur ea omnia , quæ talem suppurationem , aut potius corruptionem promovere possunt ; verum humores stagnantes , apposis tantum remediis convenientibus , resolvantur.

Quæritur utrùm resolventia exterius admovenda , vel interiorius usurpanda sint ? Cum suppuratio in *Erysipelate* intensissima sit , & resolventia suppurationem persæpè promoveant ; ideo resolventibus externis , cautè utendum est : præterea partem affectam gravant , illiusque vasa compri-

munt; unde *Erysipelas*, & illius symptomata intenduntur: quare ad summum admoveatur vinum rubrum tepidum, cui spiritus vini, si vasorum motus magis intendendus sit, simul permisceatur: pars decocto florum sambuci foveatur, vel lacte tepido, in quo flores sambuci, vel chamæmillæ infuderint. In eundem finem feliciter præscribitur linimentum simplex *Georgii Batei*, quod paratur ex succi solatri, olei rosat. ana unc. xx. coq. ad succi consumpt. colat. adde Litharg. cerusæ, ana Lib. I. *M.S.A.* Vel oleum cremoris, Ejusdem. ℞. corticis interni virid. rec. sambuci, M. III. cremor. lactis opt. Lib. II. coq. bene donec in oleum effluatur cremor. f. Express. adde cort. rec. alior. sambuc. miv. coq. iterum ad corticis siccitatem f. Expressio. Vel oleum ranarum, vel unguentum ad *Erysipelas* quod paratur ex sapon. com. unc. iv. olei sambuc. unc. i. M. pars hujus inducta papyro nigræ adhibeatur tepidè locis affectis, renovando bis in die. Sed his omnibus summâ prudentiâ utaris.

Id unum annotandum superest, nos hic de vero & legitimo *Erysipelate* agere; nam si *Phlegmone* ei adjungatur, quod dignosces ex partis affectæ adauctâ intumescentiâ, resolventia adhibeantur, prout Tumor plus vel minus increverit; uti diximus Cap. de Phlegmone.

Cum ex resolventibus exterius admotis, tanta mala per sæpè immineant; ideò resolventia interna, maximè sudorifica, & diaphoretica (uti observatione compertum est) tutius exhibentur; cave tamen, ne humorum motum nimium intendant: & ut in illis non decipiaris, febris imprimis attendas; quæ si vehementissima sit, omnia remedia volatilia infensissima forent: quare tunc exhibeantur, quæ sanguinis motum placant, ut emulsiones, julepi, reiterata venæ sectio, largus haustus prisanæ quæ paratur ex foliis capil. veneris, floribus papav. rhæad. borag. buglos. violat. vel infus. fol. Thè, & id genus alia.

Si febris minus intensa sit, & imprimis si vires sint exolutæ, præscribantur sola, vel potionum formâ anti-

mon. diaphoret. pulv. viper. salia volat. bezoar Orientale & Occidentale, confect. Alkermes, & illius syrup. confect. hyacinthi, theriaca cum aquis cordial. cardui bened. ulmariae &c.

Demum. Si hæc omnia remedia irrita fuerint, & *Erysipelas* ad suppurationem pervenerit; *Abscessus*, nondum absolutâ suppuratione, aperiatur; & hæc apertio eò major sit; ut ij Tumores ad suppurationem perfectam raro perveniant, & pars affecta *Gangrænâ*, atque *Sphacelo* persæpè corripitur; uti contigit Homini cujus totum brachium *Gangrænâ* citò correptum est, quia suppuratum *Erysipelas*, quo illa pars laborabat, non sufficienter apertum fuerat.

CAPUT IV.

De Tumoribus Frigidis in genere.

DUO in hoc Capite inquiremus. 1°. Ubinam est Tumorum frigidorum sedes. 2°. A quibus causis illi Tumores dependent.

Quoad primum. De sede Tumorum frigidorum plurimum dissentitur: Quam-plures *Pathologi* in vasis lymphaticis, alii in peculiaribus cellulis illorum sedem reponunt. Prima *Hypothesis* facile refellitur; nam, ut ait Clariss. *PITCAIRNIUS*; Dissert. de Circulatione sanguinis, in Animalibus genitis & non genitis; Si liquidum cui innatant corpuscula solida, fluat per canales quorum latera, vel ad partes motus, quo cietur ipsum, convergant; vel ab iis divergant, vel sint parallela linea motus; Cæteris paribus, facilius & sæpius impeditur liquidi motus in canali laterum ad partes motus convergentium, quàm in vase laterum parallelorum; & facilius impeditur idem motus in canali latera habente parallela, quàm in

canali laterum à partibus motûs divergentium..... Ex quibus sequitur concludit ille in rebus humano - mechanicis versatissimus, in minimis & nascentibus venis (in quibus scilicet ob differentiam distantie à corde minimam, equalis est sanguinis velocitas, ac in arteriis proximis) minùs facile, rariùsque multò contingere obstructions, quàm in evanescentibus arteriis. Verum cum vasa lymphatica ductus sint cylindrici, faciliùs impediri liquidi motum in arteriis, quàm in vasis lymphaticis, consequens est.

Nec secunda *Hypothesis* verisimilior videtur; nam undè habent qui illam tueri conantur, vasa lymphatica in illis cellulis aperiri, & in eis lympham deponere, ut per alia vasa resorbeatur. Anne quia membrana cellulosa in obesis, vesiculis pinguedine refertis tota coagmentata apparet? Sed audiant Anatomicorum facile Principem Clar. RUISCHIIUM de *MeZenterii* structurâ adversar. Anatom. Decad. 2^a. N^o. IV. Sunt enim, ait ille, extrema hac vascula (*MeZenterii*) tormenti instar subtilissimi tenuia, atque tam innumerabilia, ut totum *MeZenterium* rubescat penitus, postquàm ejus vasa, materie ceraceâ rubrâ injectâ, repleta sunt.... Equidem fateor, me non potuisse olim ita præparare *MeZenterium*, neque aliud difficilius hâc in arte habetur, quàm materiam ceraceam urgere eo usquè, ut usquè in hac vascula penetret, & tamen simul cavere, ne eadem propellatur ulteriùs; si enim urgetur plùs, postquam huc pervenit, tùm tunica cellulosa *MeZenterii* penitus eâdem materiâ repletur; ubi autèm tùm & adhuc ultrâ premitur, oritur extravasatio præternaturalis materie ceraceæ in formâ globulorum rubrorum.... Sed & pinguedinem per *MeZenterium* distributam reperio, tam numerosis ornatam vasculis sanguineis subtilissimis, ut integrè rubescat; postquàm materiâ illâ ceraceâ replevi, deindè arte non vili reddere possum eadem tamen vascula distinctè visibilia: quod quidem artificium inter cætera, eximium est.

Nos etiam, hoc anno, absque ullâ præparatione,
Epiploon

Epiploon in cadavere Mulieris 65. circiter annos nata, tot tantisque vasculis rubris refertum vidimus, ut integrè rubesceret.

Nonne dantur cellulae? Et si dentur quænam est illarum structura? Quisnam illarum usus? Ità equidè reperiantur sub cute, intra *Peritoneum*, intra duas *Mesenterii* membranas, sub tunicis intestinorum, arteriarum, viscerum, & in Musculorum facie externâ, in intimoque eorum contextu, & sub membranâ quâ obteguntur; sed quæ nec vesiculam, aut utriculū, membranam aut tunicam peculiarem efformant: nihil enim aliud sunt quàm spatia quædam inter fibras, aut lamellas membranaceas, quæ partes vicinas connectunt, comprehensa. Nam sicuti ex facie internâ tunice exterioris intestinorum, fibræ membranaceæ oriuntur, quæ variè intertextæ sacculos efformant, & deinceps tunice carneæ subjectæ inseruntur; ita etiā & in aliis partibus cellulae nihil aliud sunt, quàm spatia à fibris, quæ vicinas partes adinvicem connectunt, derelicta & inter se communicantia, quæ, si vis, cellulas vocare poteris, inter quas arteriæ lymphaticæ, seu vasa lymphatica serpunt, & uti dicit Clar. MORGAGNI Advers. Anat. 2. Animadvers. VI. de membranâ adiposâ. *Hæ, seu quædam vincula illis vasis continendis & corroborandis inserviunt.* Nam sicuti hæ fibræ membranaceæ, quæ in intestinis & in arteriis; tunice carneæ fibras, & vasa sanguinea quibus texuntur, tantūm sustentant, & illa vasa intrâ spatia ab illis derelicta non aperiuntur; ita etiā vasa alba, in illamet interstitia, partem aqueo-lymphaticam non eructant.

Cum Tumores frigidi nec in vasis lymphaticis, nec in cellulis sedem habeant, ubi ergo eorum sedes? Tumores frigidi vel à collectione partis albæ sanguinis in vasis, vel extrâ vasa dependet. Si primum, in arteriis lymphaticis. Si secundum, in cellulis, & in ipso partium textu, sedem habent.

1°. In arteriis lymphaticis. Ultimi arteriarum rami,

sanguinis parti albæ devchendæ in venas , & in vasa lymphatica *Bartholiniana* , à naturâ facti sunt , quique si parte rubrâ , fit inflammatio , si parte tantùm albâ turgeant , fiunt Tumores frigidi , scilicet *Oedema* , si ille humor aqueo-lymphaticus totam suam fluiditatem non deperdiderit ; *Scirrhus* verò si in corpus durum concreascit : Tumores enim calidi & frigidi , ubi humores non sunt extravasati , ab eorundem vasorum ingurgitatione dependent ; nam uti demonstravit Clar. PITCARNIUS. *Faciliùs & sapiùs impeditur liquidi motus in canali laterum ad partes motûs convergentium quàm in vasa laterum parallelorum ;* seu in evanescentibus arteriis , quàm in vasis lymphaticis , multò faciliùs contingere obstructions ; arteriæ enim vasa sunt conica , lymphatica verò cylindrica. Vide Clar. MORGAGNI Advers. Anat. 38. Animad. 2.

Præterea *Hydatides* in *Placentâ* , ubi nulla sunt vasa lymphatica generantur. Clar. RUISCHIUS Advers. Anætom. Decad. 2â. N°. 2°.

Tandem si omnis Tumor frigidus ab humorum extravasatione dependeret , certè *Oedema* resolutione non ità facilè desineret.

2°. In Tumoribus frigidis humores aliquandò extravasati sunt , seu intrâ cellulas & in ipso partium textu colliguntur. Arteriæ lymphaticæ , ut pote quæ textu summè debiles , ab stagnante humore seroso-lymphatico magis atque magis laxatæ facilè dilacerantur , & humores , quos continent , effusi colliguntur ; undè hæc à fibris membranaceis spatia derelicta , in formâ globulorum pellucidorum intumescunt : sicuti ab injectâ materiâ ceraceâ rubrâ globuli rubri in *Mezenterio* apparent , uti constat ex injectionibus D. RUISCHII loco citato. Tandem effusi illi humores , uti aër insufflatus ex unâ in aliam vesiculam , pro partis declivitate decidit , ut videre est , in inveteratis *Oedematibus* extremitatum superiorum & inferiorum ; ità etiàm in intimo partium textu humores colliguntur ; undè totum hepatis *Parenchyma* , spongiæ instar

æqualiter aliquoties intumescit, serososque humores undequaque imbibit. Vide GLISSONII Anatomiam hepatis Cap. VII.

Quoad secundum. Causa proxima Tumorum frigidorum est collectio humoris seroso-lymphatici in arteriis lymphaticis, vel extra sua vasa collectio; quique humor si suam fluiditatem servet, & non induruerit, *Oedema* constituit; *Scirrhum* verò, si in corpus plus vel minus durum abierit: nam *Oedema* & *Scirrhus* ab eodem humore dependent.

Sanguinis pars aqueo-lymphatica in arteriis lymphaticis hæret, aut ex illis extravasata colligitur, si vasa illa, aut venæ sanguineæ, aut vasa lymphatica *Bartholiniana* angustentur, vel dirumpantur, aut si humoris seroso-lymphatici vasa excretoria, quæ intra corporis cavitates inhiant, prætermodum dilatentur.

Primò. Angustantur Obstructione, Compressione, Astrictione, Relaxatione & Subsidentia.

1°. Arteriæ lymphaticæ obstruuntur, si sanguinis pars alba exuberet, aut qualitate peccet; uti contingit ex usu alimentorum aquosiorum, crudorum, largo potu aquarum Mineralium, perspirationis, urinæ, aut alterius serosi humoris præpeditâ secretionem.

2°. Sanguinis pars alba in arteriis lymphaticis colligitur, si hæc vasa comprimantur, aut astringantur: sed ut plurimum à compressis venis sanguineis, & vasis lymphaticis *Bartholinianis* illa humorum collectio dependet. Undè patet. 1°. Quare dum utero venæ iliacæ comprimuntur, extremitates inferiores in gravidis intumescunt. 2°. Cur ex intumescentiâ glandularum Axillarium brachia, Inguinalium verò pedes *Oedematosa* fiunt. 3°. Cur ex arctiori fasciatione, post venæ sectionem, pars intumescit.

3°. Arteriæ lymphaticæ laxantur, & subsidunt, ex aëre humidiori, nebuloso, otio, somno longiori, mœrore, tristitiâ, morbis prægressis; Indè summè debilitato arteriarum lymphaticarum elaterio, sanguinis pars alba in illis

colligitur : Undè intelliges cur in convalescentibus pedes *Oedematosi* fiant , & post magnas Hæmorrhagias *Oedemata* superveniant.

Secundò. Arteriæ lymphaticæ rumpuntur , aut dilacerantur ; tum à causis externis , tum etiam ab ipso humore seroso lymphatico , si ad illa vasa nimia quantitate appellat.

Tertiò. Vasa excretoria ultramodùm aperiuntur , & per illa maxima fit serosi humoris excretio , si illius humoris reditus per venas sanguineas , aut vasa lymphatica *Bartholiniana* compressione aut astrictione præpediatur ; aut si sanguis nimiam in textu partium moram trahat.

Quæres quare Tumores frigidi per se febrem non accersunt ?

Resp. Febris ex vitio sanguinis circuitu tantùm dependet ; in Tumoribus autem frigidis , arteriæ sanguineæ liberæ sunt , undè sanguinis circuitus ad cor , & ex corde ad partes non acceleratur : seu in *Oedemate* nulla fit febris , nisi ex collecto humore aqueo-lymphatico , arteriæ sanguineæ vicinæ angustentur , & in illis sanguinis motus præpediatur , aut summè imminuatur ; undè non febris tantùm , sed inflammatio aliquoties accenditur.

Ex his intelliges , quare *Oedemata* quæ fluxione , quàm illa quæ congestionem sunt , inflammationem & febrem sæpius accersant.

CAPUT V.

De Oedemate.

O E D E M A est Tumor albus , laxus , & mollis , frigidus , absquè dolore.

Oedema aliud est essentielle , aliud symptomaticum : utrumque si expansum sit , & non multum protuberet ,

Tumor *Oedematodes* dicitur : *Oedema* verò , si circumscriptè promineat. Tandem *Oedema* recens est , vel inveteratum.

CAUSÆ. In *Oedemate* sanguinis pars aqueo-lymphatica vel in arteriis lymphaticis , vel extrà illa vasa , vel partim in vasis , partim extra vasa colligitur : Undè causa proxima *Oedematis* est humoris aqueo-lymphatici , vel in arteriis lymphaticis , vel extrà hæc vasa collectio. Quænam sint illius collectionis causæ internæ & externæ fusè exposuimus Cap præced. Quare illis iterùm referendis lubentè supersedemus.

SYMPTOMATA. 10. *Oedema* est Tumor plus vel minùs prominens ; quia arteriis lymphaticis humore aqueo-lymphatico summè turgidis , aut quia illo humore intrà partium textum , & imprimis in illis spatiis vacuis (quæ cellulas vocant) effuso , pars quæ ex illis vasis textitur , aut sub quâ ille humor colligitur , plus vel minùs tumer.

20. Ille Tumor albus est ; quia albâ sanguinis parte efformatur : partium color ab humorum , quibus irrorantur , colore dependet.

30. Laxus est , & mollis. In *Oedemate* vasa minima , serosâ sanguinis parte madida laxari , & mollescere nemo non videt ; undè facilè intelligitur , cur pro variâ illius humoris crassitie , tumor tactui plus vel minùs facilè cedat , & pressus , nisi difficillimè restituatur.

40. Frigidus est ; Nam præter quàm quòd languida est minimorum vasorum naturalis contractio , eadem vasa , & majora etiàm vicina , albâ sanguinis parte laxata , difficiliùs moventur.

50. Tandem in *Oedemate* nullus dolor persentitur , & partis affectæ sensus naturalis summè obtunditur ; quia fibrillæ nerveæ etiàm sero laxatæ , nec distrahi , nec earum distractio ad cerebrum usquè facilè propagari potest.

Cur *Oedema* modò sit universale , modò particulare ; essentialè , vel symptomaticum , ex iis , quæ de Tumoribus in genere , & in particulari , hûc usquè diximus ,

haud difficili negotio intelligi potest.

DIAGNOSIS. Quinque sunt omnis *Oedematis* signa essentialia, quibus dignoscitur. 1^o. Hic Tumor albus est, nam hic de *Oedemate* exquisito tantum loquimur. 2^o. Mollis. 3^o. Laxus. 4^o. Frigidus. 5^o. In parte affectâ nullus dolor persentitur, & ipsius naturalis sensus non parum obtunditur.

An *Oedema* sit universale, vel particulare, essenziale, vel symptomaticum, recens, aut inveteratum, ex ægrotantium vel adstantium relatu, & ex prægressis, facile distingui potest.

Utrum humores extrâ vasa effusi sint, an in suis vasis colligantur, non æquè facile dignoscitur. Verum in vasis humores adhuc hære, suspicari poteris; 1^o. Si *Oedema* recens sit. 2^o. Si à causâ exterius dirumpente non dependeat. 3^o. Si resolventium ope facile discutiat. Econtra humores extravasatos esse asseres. 1^o. Si *Oedema* sit inveteratum. 2^o. Si resolventia omnia inutilia, aut parum proficua fuerint. 3^o. Si humores, pro partis motu, illiusque declivitate, variè moveantur, & ab uno in alium locum facile ferantur.

PROGNOSIS. *Oedema* symptomaticum, pro naturâ morbi à quo dependet, plus vel minus periculosum est. Essentielle, etsi curatu difficile sit, per se periculum non portendit.

Noxiâ sunt *Oedemata* quæ circa Ulcerum labra superveniunt, suppurationi obstant. Tandem recentia, inveteratis faciliùs curantur.

Resolutione ut plurimum, suppuratione nunquam *Oedema* per se terminatur: aliquotiès in *Scirrhum*, rariùs in *Gangrenam* degenerat, quod periculosissimum est.

CURATIO. *Oedema* duplex est, essenziale & symptomaticum. De symptomatico hic non agimus, quod ritè debellari non potest, nisi priùs, aut saltèm eodem tempore, morbis, à quibus dependet, medeamur.

Oedema, sicut Tumores inflammatorii, sua habet tem-

pore, quod proinde, nè augeatur. 10. Præpediendum est. 20. Factum citò dissipandum est. 30. Si quæ sint gravia symptomata, mitiganda, & debellanda sunt.

Quoad primum. Ne *Oedema* incrementum suscipiat, præpediet Medico-Chirurgus; si, remotis causis externis, humoris aqueo-lymphatici quantitatem imminuat, qualitatem corrigat, & partem contra affluentes humores muniat & firmet.

Primò. In curatione *Oedematis* noxia potius, quàm proficua est venæ sectio; quare saltem ratione *Oedematis*, vena nunquam secetur; hinc jam summè debilis sanguinis motus, magis atque magis languesceret. Ideò vel per alvum, vel per cutim, vel per renes, prout indicatum fuerit, humorum quantitas imminuatur, & qualitas corrigatur. Dixi prout indicatum fuerit; nam si *Oedema* à præpeditâ perspiratione, V. G. non dependeret, aut cutis jam non madesceret, vel alia sudorem indicantia non adessent; tunc uti loquuntur, *Diaphoreticis*, aut *Sudorificis* præscriptis, *Surdo canere esset*. Ità & de aliis evacuationibus; Quare, ne in illis remediis usurpandis Medico-Chirurgus decipiatur, sciscitetur imprimis, num *Oedema* à perspiratione, aut aliâ præpeditâ evacuatione dependeat; an verò sint peculiaris evacuationis signa.

10. Si à vitiatâ alimentorum coctione inducatur, aut excretionis per alvum signa quædam appareant, cathartica in usum advocet, quæ ibi eò validiora adhibenda sunt, quò partium textus laxior est, qualia sunt senn. Jalap. Mechoac. Turbith. Gumm. Brionia, Elaterium, succ. express. Iris nostratis, cortic. sambuc. Diagryd. Diaphœnic. hiera-picra, confect. hamec. aq. Germanic. quæ nihil aliud est quàm tinctura ex radicibus Ireos florentin. & Jalap. partibus æqualibus, spiritu vini extracta.

Verum, quia humores aut crassiores, aut vasa illis expellendis imparia sunt, ideò prius resolvantur, & attenuantur, ut inde per alvum, cutim, aut renes facilius erumpentes, remediorum ope emungantur. Quare præscripto

Cathartico, varia ex Marte parata, ut *croc. mart. vel Tartar. Calyb. sola*, vel cum *Catharticis* permixta exhibeantur: quibus ad magis incidendum adde *salia absinth. Tamatisc. Mercur. dulc. vel Æthiop. mineral. & cynnamom.* ad partes laxas aliquatenus firmandas. Dùm humores inciduntur, *Cathartica* identidem exhibeantur, ut soluti humores per alvum eâ proportionem foras eliminantur.

20. Si humores per renes effluere videantur, & *Oedema* ab urinæ secretionem præpeditâ dependeat, non neglectis *Catharticis*, ad *Diuretica* confugas, talia sunt radic. *Ering. Ononid. asparag. Brusç. parieræ bravæ, pimpinel. fol. capil. vener. politric. parietar. sem. paliur. Tartar. vitriol. & id genus alia*, quæ jussulorum formâ præscribi possunt. Tandem mille pedes pulverati, & in vino albo soluti contra *Oedema*, & in *Hydrope* ipso, feliciter adhibentur.

30. Si *Oedema* à præpeditâ perspiratione (uti plurimum contingit) inducatur, aut corpus jam madidum fuerit, & sudor immineat, ad *Diaphoretica & Sudorifica* citò confugiendum est; qualia sunt radic. *salsæparil. schin. Bardan. scorfoner. lign. sassafras, gaiaci & ejusdem cortex. fol. ulmar. scordii, card. benedict. aq. papav. rhæados, scabios. ulmar. bardan. card. benedict. theriaca, diascord. pulv. viper. sal. card. benedict. antimon. diaphoret. Bezoard Orient. & Occident. salia volatil. cranii humani, viper. cum jussulis, vel vino, vel potionum formâ. Tandem mirè prosunt jussula ex viperis parata, baln. aquar. Thermalium, ut *Bellilucanarum & arenæ maris calidæ.**

Dum hæc varia remedia exhibentur, diæta sit exsiccans, & calefaciens; undè ægri aëre calido, & sicco, alimentisque ejusdem indolis utantur. Caro assata præstat elixatâ, corpus remotis omnibus curis, & animi sollicitudinibus, absquè defatigatione exerceatur.

Secundò. Veteres in principio *Oedematis*, repellentia frequentè in usum advocabant; verum si *Oedema* à proprio partis vitio non dependeat, non minùs noxia sunt quam

quàm in Tumoribus calidis ; nam præter quàm quòd vasa aliundè summè laxa comprimunt , repulsâ in magna vasa sanguinis parte aqueo - lymphaticâ , humorum moles adaugetur , illorum qualitas inquinatur , & persæpè totum pervertitur ; quare tunc penitus abdicanda esse , cum omnibus ferè recentioribus existimamus. Si verò *Oedema* a solo partis vitio inducatur , & foveatur , præter repercutientia , de quibus egimus Cap. II^o. pars affecta fasciis circumvolutis , sed non nimis arctè devinciatur , & hæc etiàm summâ cautelâ adhibeantur.

Quoad secundum. Humor aqueo-lymphaticus in vasis , aut extra vasa collectus educitur. 1^o. *Catharticis* vel *Sudorificis* , vel *Diureticis* , prout indicata fuerint. 2^o. Resolventibus exterius admotis , quæ calida sint ; nam humores aqueo - lymphatici in vasis laxis stagnant : talia sunt omnia medicamina , quæ *Cephalica* vocantur , ut sal. ros. mar. laur. calament. puleg. organ. &c. quibus adde flor. sambuc. chamæmilli , melilot. brionix : commendantur emplastra ex radic. cucumer. asinin. calx viva cum axungia porci mixta , stercus bubullum , sal ammoniac. urina humana putrida , cineres vitis , genist. sulphur vivum , ex quibus parantur semicupia , foci , vel cataplasmata. Hosce Tumores Ebuli etiàm mirè discutunt , si calore tepentes parti affectæ per aliquot dies , manè , seroque applicentur.

Cum *Oedema* per se pus nunquàm emittat ; ideò suppurantia non adhibeantur ; si verò inflammatio ei adiungatur , irritis solventibus , ad suppurantia confugiendum est : sed hæc ad Tumores compositos pertinent.

Nisi materia penitus concocta fuerit , *Abscessus* non aperiatur : hi Tumores pus legitimum rarò , aut nunquàm emittunt , & *Oedema* nisi intra longum tempus totum in suppuratum non abit : Quare *Abscessus* cauteriis potentialibus , quàm ferro non ignito , tutius aperiuntur.

Quoad tertium. *Oedema ascircem* , vel *hydropem* pectoris & *anasarcam* aliquandò inducit , aut illorum prodromus

est , quorum tractatio ad morbos internos pertinet. Si *Oedemati gangrena* superveniat , ea omnia adhibeantur , quæ partis motum & sensum extinctos exsuscitare poterunt , uti dicetur ubi de *Gangrena*. Tandem si in *Scirrhum* mutetur , illius cura ex Cap. seq. repetatur.

CAPUT VI.

De Scirrho.

SCIRRHUS est Tumor durus , pressioni non cedens , doloris expers , absque cutis nativi coloris mutatione.

Scirrhus alius est essentialis , alius symptomaticus , recens , vel inveteratus : uterque perfectus , si materia verè indurata sit ; imperfectus verò , si summam duritiem nondum adepta fuerit.

In *Scirrho* pars affecta summè , & sat circumscriptè tumet , vel Tumor superficiarius est : Si primum , *Scirrhi* nomen retinet : Si secundum , Tumor *Scirrholes* dicitur.

CAUSÆ. *Scirrhi* & Tumoris *Scirrholes* causa proxima est ut plurimum albæ sanguinis partis , plus vel minus concretæ & induratæ in arteriis lymphaticis , vel extra illa vasa major , vel minor collectio.

Dico 1°. Causam proximam *Scirrhi* & Tumoris *Scirrholes* esse ut plurimum sanguinis partis albæ , plus vel minus concretæ collectionem ; quia , etsi lac , adeps , & alii humores aliquoties concrecant ; *Scirrhus* ex albâ sanguinis parte induratâ quàm sæpè dependet , uti imprimis observare est in *Scirrhis* symptomaticis.

Dico 2°. In arteriis lymphaticis. Probavimus Cap. 4°. humores in ultimis arteriarum finibus , quàm in vasorum secretoriorum tractu faciliùs hæreere ; undè , cum *Scirrhus* ab induratâ sanguinis parte albâ persæpè dependeat , in

illis vasis potius , quàm in aliis colligi , consequens est. Præterea humores extravasati , multò difficiliùs concre- cere possunt. Aliunde posita humorum extravasatione , *Scirrhi* incrementum difficilè concipitur. Insuper Tumores inflammatorii in *Scirrhum* quandòque mutantur , aut *Scirrhus* per longum tempus vitiatam tantùm humorum cir- culationem consequitur. Verùm tamen humores extra sua vasa etiàm concreescere non diffitemur , sed exinde peculia- res Tumores ut plurimùm excrescunt , de quibus hic non agitur.

Scirrhus per se , seu essentialis sensim & sine sensu fit ; qui verò symptomaticus est , citò , aut intra breve tem- pus ut plurimùm concreescit , & induratur ; quare inqui- remus. 1^o Quo mechanismo *Scirrhus* essentialis. 2^o. Sym- ptomaticus efformantur , & quænam sunt utriusque causæ antecedentes & *procatartica*.

Primò. De *Scirrho* essentiali. Ut tota *Scirrhi* essentia- lis prima genesis , & incrementum clariùs pateant ; duo etiàm inquirenda sunt. 1^o. Quare sanguinis pars alba in suis vasis hæreat , & induretur. 2^o. Cur indurata alia con- tinuò adhæreat , etiàm concreescenda ; ita ut *Scirrhus* in immensam molem aliquotiès excrescat.

Quoad primum. Sanguinis pars aqueo-lymphatica in arteriis lymphaticis hæret , & stagnat , vel sui vitio , vel eorundem vasorum defectu , seu quia illa vasa obstruun- tur , vel comprimuntur , vel astringuntur , vel laxata fuerint.

Arteriæ lymphaticæ obstruuntur , si lymphæ quantitate , sed imprimis qualitate peccet , seu si crassior , & spissior fuerit ; unde quæ hanc sanguinis partem inspissare pote- runt , inter remotas *Scirrhi* causas meritò recensentur : qualia sunt aër calidior , vel frigidior , & siccior , alimen- ta crassa , coctu difficilia , piperata , acria , calida , liquo- rum ardentium usus , vita deses & otiosa , somnus diutur- nior , vigiliæ nimix , exercitia immodica , atque vehemen- tiora animi pathemata.

De Causis vasorum compressionis , astrictionis &c. huc

usque fusè egimus; quare in illis iterùm exponendis, non immorabimur.

Quoad secundum. *Scirrhi* initia parva sunt, à veluti granulo incipit; ergò lympham in principio *Scirrhi* parvâ quantitate colligi, consequens est: minima hæc lymphæ quantitas vasorum, maximè vicinorum, repetitis ictibus, dissipata illius parte aquosiori, aut tota validè pressa, concrescit & induratur; hinc primum *Scirrhi* exordium. Verùm, quia per circulationis leges alba sanguinis pars ad vasa jam obstructa indefinenter appellit, & ultrà non progrediens in illis hæere tenetur; vasa vicina quoque obstruuntur, lymphæ hæc undique pressa etiàm concrescit, & *Scirrhi* moles plus vel minùs adaugetur, & induratur, quò lymphæ majori vel minori quantitate hærens, plus vel minùs premitur & densatur.

Ex dictis facilè intelliges; cur alii humores, vel in vasis, ut lac in mammis, bilis in hepate, humor bronchialis in textu pulmonum, & asperæ arteriæ tractu, adeps ipsa in vasis pinguisferis &c. vel extrà vasa effusi concrecere & *Scirrhum* efformare poterunt.

Secundò. De Scirrho symptomatico. Hæc *Scirrhi* species morbos chronicos sequitur, aut Tumores inflammatorii in hunc morbum degenerant.

1^o. Toto morborum chronicorum tempore, humorum, maximè albæ sanguinis partis motus in intimo partium, viscerumque imprimis, contextu summè retardatur. Qui in eorum arteriis lymphaticis humores hærent & stagnant, repetitis & diuturnis vasorum vicinorum motibus densati concrescunt, & indurantur, seu *Scirrhus* in illis partibus progignitur. Præterea viscera obstructa, aut *Scirrho* jam tentata, suâ mole, & pondere lymphæ motum in partibus vicinis remorantur; unde *Oedema* vel *Scirrhus* in illis quoque partibus generatur.

2^o. Tum vi ipsius inflammationis, tum ob remedia calidiora exterius admota, Tumores inflammatorii in *Scirrhum* aliquoties mutantur; hinc enim partis affectæ vasis

nimiùm oscillantibus , si humores non resolvantur , globuli sanguinei atteruntur & tenuiores facti , atque dispersi vasa sanguinea vicina subeunt , aut cum parte albâ intimè permixti unum corpus , plus vel minùs album component , quodque magis vel minùs indurefcit , quò vasorum repetitis contractionibus humores illi plus vel minùs densantur.

SYMPTOMATA. In *Scirrho* vasa sanguinis parte albâ induratâ replentur ; unde 1^o. *Scirrhus* durus est. 2^o. Pressioni non cedit. 3^o. Est doloris expers. Nam 1^o. si *Scirrhus* sensim & sine sensu concrefcit , sanguis appellens per vasa vicina liberè progreditur. 2^o. Vasa induratâ materiâ infarctâ , ut totidem corpora solida commoveri , atque fibræ nerveæ præternaturam distrahi nequeunt. 3^o. Ex eo ipso , quod sanguinis motus in vasis vicinis liber sit , & cutis ut plurimùm intacta ; cur cutis , quâ *Scirrhus* exterius obtegatur , colorem servet , & pili in illâ excrescant , facile deducitur.

Prout humores magis vel minùs induruerint , & Tumor plus vel minùs prominat , *Scirrhus* perfectus est , vel imperfectus , prominens vel superficiarius ; sed hæc ulteriori explicatione non indigent.

DIAGNOSIS. *Scirrhum* simplicem & perfectum dignosces ; si Tumor durus sit , absque dolore pressioni resistat , & si cutis , quâ obtegatur , colorem naturalem non mutaverit. Imperfectus tactui minùs resistit. Tandem in Tumore *Scirrhone* pars minùs , quàm in *Scirrho* prominat.

Utrum recens sit , an inveteratus ex duritie , sed imprimis ex ægrotantis relatu , facile distingues. Item *Scirrhus* essentialis , & symptomaticus ex prægressis dignoscuntur , & ab invicem distingui possunt.

Scirrhus 1^o. ab *Oedemate* distinguitur duritie , & quia tactui non cedit. 2^o. A *Cancro* quia est doloris expers. 3^o. A Tumoribus in *Cystide* reclusis , hi digitis facile cedunt , & ad latera moveri persentiuntur ; *Scirrhus* autem partibus affixus hæret. 4^o. A Tumoribus inflammatoriis , rubore , calore , & dolore.

PROGNOSIS. Omnis *Scirrhus* difficilè curatur : *Scirrhi* enim incipientis curatio , nisi intra longum tempus absoluitur , & inveteratus ut plurimùm incurabilis est ; aut si non debitè tractetur , in *Cancrum* degenerat.

Pessimum est , si *Scirrhus* dolere incipiat ; in *Cancrum* mutatur.

Scirrhus multò periculosior est in partibus membranaceis , tendineis , nerveis , articulis , quàm si in parte carneâ fiat.

Scirrhus difficilè resolvitur ; cum in suppurationem vertitur , periculum est , ne Tumor *Carcinodes* evadat.

CURATIO. In ipso *Scirrhi* principio , humores duri & concreti sunt ; unde *Repercutientia* eò magis nocent , quòd illorum usu materia magis densatur , & compingitur : Ità etiàm & venæ sectio inutilis est ; nisi æger sit plethoricus , & ut remedium universale præmitatur , vel sanguinem in partes oppositas divertere oporteat , vel *Scirrhus* ab aliquâ sanguineâ evacuatione , ut catameniis , vel hæmorrhoidum criticarum fluxu , suppressis dependeat : sanguini divertendo , & illis evacuationibus restituendis , sanguinis missionem in partibus vicinis vel remotis , prout indicatum fuerit , plurimùm conferre experientia quotidiana docet. Sed hæc non sunt hujus loci.

Cum *Scirrhus* ad resolutionem perfectam difficilè perducatur ; & si in suppurationem vertat , in *Cancrum* quàm sæpè mutetur. Ideo à remediis internis , si quæ sit , curationis spes tota ferè expectanda est ; quæque , nisi prudenter adhibeantur , malum etiàm adaugent intenduntque ; quare , remotis causis externis , æger alimentis boni succi & coctu facilibus , humidis potiùs , quàm siccis nutriatur , aër sit temperatus ; atque in aliis rebus non-naturalibus ritè se habeat. Tandem impacti humores priùs diluantur , deinceps attenuentur , ut fluidiores facti remediis appositis foràs eliminentur.

Itaque misso sanguine è brachio (hic loquor de *Scirrhus* essentiali) *Catharticum* non ex *Mochlicis* , ut veteri-

bus, & recentioribus quibusdam placet; sed ex mitioribus purgantibus, maximè si *Scirrhi* materia summè indurata sit, concinnetur: Et certè nonne *Cathartici* validioribus humorum motus maximè intenditur, & serosis humoribus nimia quantitate emunctis, vasa arescunt, & qui in vasis humores restitant, crassescunt, & spissescunt; unde *Scirrhum* magis indurescere, necessum est: quare tanquàm noxia in *Scirrho* debellando helleborum nigrum, elaterium, confectionem hamech, & id genus alia rejicimus: senna etiàm tutò non præscribitur; nisi evacuandi necessitas maxima sit, & humores *Cathartici* facilè cedere, jam perspectum habeamus. Ergò ea tantum *Cathartica* adhibeantur, quæ minori vi agunt, qualia sunt, quæ in curatione *Phlegmones* recensuimus. Tandem *Cathartica* magis, vel minùs valida in usum advocentur, in quantum Tumor plus vel minus durus fuerit.

Præscripto *Cathartico*, æger per novem dies, horà matutinà capiat juscula, quæ ex juniore pullo gallinaceo, quatuor sem. frig. maj. oryzâ, vel hordeo, fol. borrag. cichor. endiv. lactuc. parentur. die decimo, ut in principio, potionem *Catharticam* hauriat.

Si iisce remediis *Scirrhus* remollescat, alia juscula ex incidentibus, vel unà cum diluentibus, prout *Scirrhus* plus vel minùs durus fuerit, parata præscribantur. Incidentia sunt radices asparagi, brusci, &c. de quibus in Cap. de *Oedemate*. In ollâ, in quâ hæc juscula conficiuntur, noduli duo, ex ferro rore majal. parato uno, altero rhabarbaro leviter contuso, toto ebullitionis tempore, suspendantur.

Finito jusculorum usu, aut citiùs, si indicatum fuerit, *Catharticum* ex sennâ, rhabarbaro, mannâ, aut validioribus purgantibus, prout necessum fuerit, præscribantur.

Cùm inter incidentia nullum adhuc ferro, tutiùs & certius inventum fuerit; ægotantes ad illud tanquàm ad sacram anchoram, quàm primùm confugiant: verùm, quia ferro humores validè commoventur, solidaque disten-

duntur , in illo exhibendo prudenter etiã se gerat Me-
dico - Chirurgus : ut autem in illis non decipiatur , & ex
ferri usu ægri solamen percipiant , 1^o. parvã dosi seu ad
grana septem aut octo primis diebus exhibeatur , sensim
adaugendo ad gr. xx. prout ægri ex illius usu meliùs se
habuerint. 2^o. Partitis dosibus per menses integros hoc
medicamine uti oportet.

Si humores magis incidere necesse sit , sal ammoniac-
cum , vel borax cum marte simul permisceas. Ex iis quæ
diximus de *Scirrho* essentiali , quã methodo symptomati-
cus tractandus sit , facilè intelligitur ; sed de iis alibi fusè
egimus.

In admovendis remediis externis , non minùs prudenter
se gerere oportet : malè adhibita , internis multò magis
nocent : quare nec resolventia humidiora applicentur ,
nè pars affecta nimium laxetur ; unde *Scirrhus* in *Can-
crum* persæpè degenerat. Nec resolventia calidiora sint ,
humores prætermodum commovent , & vasa maximè dis-
tendunt ; unde inflammatio , & *Gangrena* ipsa aliquan-
dò superveniunt ; ideò felicissimi practici calida cum fri-
gidis resolventibus permixta admovent. Præter resolven-
tia frigida & calida de quibus egimus Cap. 20. & 30. in
usum adhibentur radices hellebori nigri , brionix , cicuta ,
hyosciamus , adeps gallinæ , anseris , ursi , axungia homi-
nis , oleum lumbicorum , laurinum , gummi ammoniac.
galbanum , bdellium , opoponax , emplastrum de vigo ,
de sulphure , diabotanium , de cicuta. Civis Monspeliën-
sis nomine RICHARD , qui à pluribus annis *Scirrho*
lienens laborabat (lien autem tantam molèm adeptus fue-
rat , ut totam abdominis cavitatem replere videretur) nul-
lo alio , præter emplastrum de cicutâ , adhibito remedio in-
tra duos menses resolutione externâ sanatus fuit.

Nisi Tumor iisce remediis exterius admotis , intra ali-
quod tempus resolvi incipiat , ab omnibus abstinere tutius
est ; Nam cancer aut suppuratio imperfecta fere semper
subsequuntur : verum si *Scirrhus* pus emittere videatur ,
suppurantia

Suppurantia de quibus jam egimus summā quoque prudentiā admoveantur.

Abscessus, nisi suppuratio absoluta sit, quæ tardè & quàm sæpè imperfectè perficitur, non aperiatur; hæc autem apertio, modò tumor jam *Carcinodes* non sit, cauteriis potentialibus, seu lapide caustico fiat, alioquin ferro non ignito aperire tutiùs foret. Alii, neglectis aliis remediis, aut quia parùm proficua fuere, *Schirrhum* forcipibus, vel scalpello evellere suadent; at quia hic Tumor altas radices egit, nisi difficile & imperfectè evellitur: prætereà exinde mala ipso *Scirrho* graviora subsequuntur, quare hanc methodum ut inutilem & parùm tutam rejicimus.

F I N I S,

ERRATA.

Pag. 2. lin. 13. incipiat, leg. incipit. Ibidem, lin. 23. sicca, leg. fixa. Pag. 4. lin. 15. augere, leg. augere valent. Ibid. lin. 24. obturant, leg. obturat. Pag. 14. lin. 10. colcothar, leg. colchotar. Ibid. lytargirio, leg. lithargyro. Pag. 15. lin. 26. de Suppurationibus, leg. de Suppurantibus. Pag. 16. lin. 28. inflammatorius, leg. inflammatorius, superficiarius. Pag. 21. lin. 13. leviora, leg. læviora. Pag. 24. lin. 18. tormenti, leg. tomenti. Pag. 25. lin. 20. seu vasa, leg. & vasa. Ibid. lin. 26. sustentant, leg. sustentant. Pag. 26. lin. 15. anat. 38. animad. 2. leg. anat. 2. animad. 38.